

S T A T U T
REGULATORNE KOMISIJE ZA ENERGIJU
U FEDERACIJI BOSNE I HERCEGOVINE

Mostar, 30.10.2013. godine

Na osnovu člana 17. i člana 36. Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13), Regulatorna komisija za energiju u Federaciji Bosne i Hercegovine na XVIII redovnoj sjednici održanoj u Mostaru 30.10.2013. godine usvojila je

S T A T U T
REGULATORNE KOMISIJE ZA ENERGIJU
U FEDERACIJI BOSNE I HERCEGOVINE

DIO PRVI - OPŠTE ODREDBE

Član 1.
(Predmet)

Ovim Statutom uređuje se naziv, sjedište, pravni status, nadležnosti i obaveze, organizacija i upravljanje, predstavljanje i zastupanje, ovlaštenja i način odlučivanja, opšti akti, javnost rada, zaštita povjerljivih informacija i druga pitanja od značaja za rad Regulatorne komisije za energiju u Federaciji Bosne i Hercegovine.

Član 2.
(Pravni osnov i cilj osnivanja)

Regulatorna komisija za energiju u Federaciji Bosne i Hercegovine vrši svoje nadležnosti u skladu sa Zakonom o električnoj energiji u Federaciji Bosne i Hercegovine i drugim zakonima iz oblasti energije, a sa ciljem obezbjeđenja transparentnog i nediskriminirajućeg položaja učesnika na energetsom tržištu u Federaciji Bosne i Hercegovine.

Član 3.
(Naziv i sjedište)

- (1) Naziv Regulatorne komisije je: Regulatorna komisija za energiju u Federaciji Bosne i Hercegovine.
- (2) Skraćeni naziv Regulatorne komisije za energiju u Federaciji Bosne i Hercegovine je : FERK.
- (3) Naziv Regulatorne komisije za energiju u Federaciji Bosne i Hercegovine na engleskom jeziku je: Regulatory Commission for Energy in Federation of Bosnia and Herzegovina.
- (4) Sjedište Regulatorne komisije za energiju u Federaciji Bosne i Hercegovine (u daljem tekstu: FERK) je u Mostaru.

Član 4.
(Pravni status)

- (1) FERK ima status pravnog lica.

- (2) U pravnom prometu sa trećim licima FERK zastupa i predstavlja predsjednik FERK-a.
- (3) FERK je odgovoran za ugovorene obaveze koje proizilaze iz njegovog poslovanja.

Član 5. **(Samostalnost)**

- (1) FERK je specijalizovana, samostalna, nezavisna i neprofitna organizacija u Federaciji Bosne i Hercegovine.
- (2) FERK je pravno odvojen i funkcionalno nezavisan od bilo kojeg političkog organa, vladinog organa ili nekog drugog javnog ili privatnog organa prilikom sprovođenja dodijeljenih mu nadležnosti.
- (3) FERK o svom radu podnosi izvještaj Parlamentu Federacije BiH najmanje jednom godišnje.

Član 6. **(Pečat)**

- (1) FERK ima pečat u skladu sa članom 20. Zakona o električnoj energiji u Federaciji Bosne i Hercegovine.
- (2) FERK ima prijemni štambilj.
- (3) Opštim aktom FERK-a utvrđuje se način upotrebe pečata, lica odgovornog za njihovo čuvanje i druga pitanja u skladu sa Zakonom o pečatu Federacije Bosne i Hercegovine („Službene novine Federacije BiH“ broj 2/94, 21/96 i 46/07), te izgled, način upotrebe i čuvanja prijemnog štambilja.

Član 7. **(Znak i memorandum)**

- (1) FERK ima zaštitni znak koji se ističe na poslovnim aktima FERK-a i na poslovnim prostorijama FERK-a.
- (2) Zaštitni znak FERK-a sadrži riječ FERK i to na način da je drugo slovo u riječi FERK znatno manje, a riječ FERK je obuhvaćena eliptičnom konturom koja stilizovano predstavlja neprekidan tok energije.
- (3) Memorandum FERK-a u zaglavlju sadrži zaštitni znak FERK-a i puni i skraćeni naziv FERK-a napisan latinicom i ćirilicom. Podnožje memoranduma sadrži adresu, kontakt telefon, faks, web stranicu, elektronsku adresu, identifikacioni broj, te transakcijski račun FERK-a.

Član 8. **(Bankovni račun)**

FERK ima potrebne bankovne račune za obavljanje poslova u zemlji i inostranstvu, u skladu sa propisima Federacije Bosne i Hercegovine i Bosne i Hercegovine.

Član 9.
(Pregled sadržaja)

Odredbe ovog Statuta regulišu:

- a) Nadležnost i organizaciju FERK-a,
- b) Način rada FERK-a,
- c) Finansiranje rada FERK-a,
- d) Transparentnost rada FERK-a,
- e) Zaštitu povjerljivih informacija FERK-a,
- f) Postupak izmjene i dopune Statuta FERK-a,
- g) Saglasnost na Statut i tumačenje Statuta FERK-a,
- h) Prelazne i završne odredbe.

DIO DRUGI - NADLEŽNOST I ORGANIZACIJA FERK-a

Član 10.
(Nadležnosti FERK-a)

- (1) U skladu sa Zakonom o električnoj energiji u Federaciji Bosne i Hercegovine, nadležnosti FERK-a su:
 - a) nadzor i regulisanje odnosa između proizvodnje, distribucije, snabdjevanja i kupaca električne energije, uključujući i trgovce električnom energijom, u skladu sa Zakonom o električnoj energiji u Federaciji Bosne i Hercegovine i provedbenim akima FERK-a,
 - b) nadzor tržišta električne energije,
 - c) donošenje metodologije i kriterija za utvrđivanje tarifnih stavova za nekvalifikovane kupce, provođenje usvojene metodologije i vršenje nadzora nad primjenom tarifnih stavova za nekvalifikovane kupce, kao i donošenje metodologije i kriterija za utvrđivanje cijena usluge javnog snabdjevača, vremena trajanja usluge javnog snabdjevača i vršenje nadzora nad primjenom cijene usluge javnog snabdjevača,
 - d) donošenje metodologije i utvrđivanje tarifnih stavova, rokova i uslova za korištenje distributivnih sistema. Tarifni stavovi treba da omoguće neophodna ulaganja u distributivnu mrežu, koja se treba izvesti na način kojim će se osigurati održivost i razvoj mreže,
 - e) utvrđivanje tarifnih stavova za nekvalifikovane kupce,
 - f) utvrđivanje cijena usluge javnog snabdjevača do potpunog otvaranja tržišta električne energije ili davanje saglasnosti na cijene usluge javnog snabdjevača nakon potpunog otvaranja tržišta električne energije,
 - g) donošenje metodologije za utvrđivanje naknade, rokova i uslova za priključak na distributivnu mrežu,
 - h) davanje saglasnosti ili utvrđivanje iznosa naknada za priključak na distributivnu mrežu,
 - i) izdavanje, obnova, prenos ili oduzimanje dozvola za proizvodnju, distribuciju, snabdjevanje, trgovinu električnom energijom i operatora za obnovljive izvore energije i kogeneracije,
 - j) izdavanje prethodne saglasnosti za izgradnju direktnih dalekovoda u skladu sa provedbenim aktom,

- k) donošenje Opštih uslova za isporuku električne energije i Mrežnih pravila distribucije,
 - l) donošenje metodologije o načinu utvrđivanja garantnih otkupnih cijena električne energije iz postrojenja koja koriste obnovljive izvore i kogeneraciju,
 - m) utvrđivanje referentne cijene električne energije za postrojenja koja koriste obnovljive izvore i kogeneraciju,
 - n) donošenje metodologije za utvrđivanje troška uglja, koji se koristi za proizvodnju električne energije do potpune deregulacije proizvodnje,
 - o) utvrđivanje troška uglja za termoelektrane u skladu sa propisanim metodologijom za utvrđivanje cijene uglja koji se koristi za proizvodnju električne energije do potpune deregulacije proizvodnje,
 - p) propisuje proceduru i kriterije za odabir Rezervnog snabdjevača, uključujući i vrijeme trajanja usluge Rezervnog snabdjevača, te vrši nadzor nad primjenom cijene usluge Rezervnog snabdjevača,
 - q) pokretanje postupka za izdavanje prekršajnih naloga u skladu sa kaznenim odredbama zakona,
 - r) donošenje metodologije za utvrđivanje količina i cijene za obračun električne energije na osnovu neovlaštene potrošnje,
 - s) provođenje arbitraže kako je utvrđeno u članovima 39. i 40. Zakona o električnoj energiji u Federaciji Bosne i Hercegovine,
 - t) ostale nadležnosti propisane Zakonom o električnoj energiji u Federaciji Bosne i Hercegovine.
- (2) FERK osigurava nediskriminaciju, efikasnu konkurenciju i efikasno funkcionisanje tržišta električne energije, obraćajući posebnu pažnju na:
- a) kvalitet snabdijevanja električnom energijom koja se odnosi na kvalitet usluga, a posebno na:
 - 1) vrijeme potrebno Operatorima distributivnih sistema za obavljanje priključenja i popravki;
 - 2) neprekidnost napajanja;
 - 3) kvalitet električne energije;
 - b) razdvajanje računa i upravljanja, radi izbjegavanja unakrsnih subvencionisanja između djelatnosti proizvodnje, distribucije i snabdijevanja;
 - c) objavljivanje odgovarajućih informacija Operatora distributivnog sistema koje se odnose za pristup distributivnoj mreži i korištenje distributivne mreže;
 - d) čuvanje povjerljivosti komercijalno-poslovnih informacija koje koriste Operatori distributivnog sistema;
 - e) uslove, pravila i tarife za priključenje novih proizvođača električne energije koji garantuju objektivnost, transparentnost i ravnopravnost, posebno uzimajući u obzir troškove i koristi različitih tehnologija koje koriste obnovljive izvore energije, od distribuisane proizvodnje i kogeneracije i ispunjavanje obaveza Operatora distributivnog sistema utvrđenih Zakonom o električnoj energiji u Federaciji Bosne i Hercegovine i podzakonskim aktima.
- (3) Pored nadležnosti iz stavova (1) i (2) ovog člana FERK će obavljati i poslove propisane mu drugim zakonima i propisima iz oblasti energije.
- (4) FERK će poslove iz svoje nadležnosti iz stavova (1), (2) i (3) ovog člana obavljati u skladu sa Elektroenergetskom strategijom i Elektroenergetskom politikom Federacije BiH, kao i privremenim smjernicama elektroenergetske politike iz člana 11. Zakona o električnoj energiji u Federaciji Bosne i Hercegovine.

Član 11.
(Obaveze FERK-a)

- (1) U izvršavanju svojih ovlaštenja i obavljanju svojih funkcija prema Zakonu o električnoj energiji u Federaciji Bosne i Hercegovine, FERK je obavezan:
- a) u skladu sa međunarodnim normama i standardima Evropske unije, Elektroenergetskoj politici, reformi energetskeg sektora, provedbenim propisima i aktima DERK-a osigurati postepeno uvođenje, regulisanje i razvoj tržišta električne energije, kao i osigurati transparentne i ravnopravne odnose između svih učesnika na tržištu,
 - b) štiti prava učesnika u energetskeg sektoru (kupce, operatore distributivnog sistema, proizvođače, snabdjevače i trgovce),
 - c) stvarati uslove za efikasan, pouzdan i ekonomičan sistem proizvodnje, distribucije i snabdjevanja električnom energijom,
 - d) stvarati uslove za konkurentnost u proizvodnji i snabdjevanju električnom energijom,
 - e) stvarati uslove za efikasanost, ekonomičnost i sigurnost pri korištenju električne energije,
 - f) stvarati odgovarajuće uslove za održivost i razvoj elektroenergetskog sistema (proizvodnje i distribucije),
 - g) regulisati kvalitet usluga na svim nivoima, kao i tarife i naknade koje se plaćaju za regulisane usluge u distribuciji, imajući u vidu interese i potrebe svih korisnika za snabdjevanje električnom energijom,
 - h) nadgledati efikasanost mehanizama i procesa radi osiguranja ravnoteže između potražnje i ponude električne energije,
 - i) podsticati učesnike u elektroenergetskom sektoru na aktivnosti vezane za sigurnost ljudi i zaštitu okoline,
 - j) pratiti i nadgledati izvršavanje odredbi i uslova iz izdatih dozvola i
 - k) donositi provedbene propise za ostvarivanje propisanih nadležnosti.
- (2) Pored obaveza iz stava (1) ovog člana FERK izvršava i obaveze u skladu sa drugim zakonima i propisima iz oblasti energije.

Član 12.
(Unutrašnja organizacija FERK-a)

- (1) Poslovi iz članova 10. i 11. ovog Statuta obavljaju se u okviru organizacionih jedinica FERK-a. Unutrašnju organizaciju FERK-a čine sljedeće organizacione jedinice:
- a) Sektor za pravne poslove,
 - b) Sektor za tehničke poslove i licence,
 - c) Sektor za tarife i tržište,
 - d) Sektor za ugalj,
 - e) Sektor za finansije,
 - f) Sektor zajedničkih poslova.
- (2) Pored ovih organizacionih jedinica članovi FERK-a mogu odrediti i druge organizacione jedinice u cilju efikasnijeg obavljanja poslova iz nadležnosti FERK-a.

Član 13.
(Rukovođenje organizacionim jedinicama)

- (1) FERK imenuje sekretara FERK-a.
- (2) Sektorima iz člana 12. stav (1) ovog Statuta rukovode rukovodioci sektora.
- (3) Sekretar FERK-a kordinira radom sa sektorima iz člana 12. stav (1) ovog Statuta radi blagovremenog provođenja ciljeva FERK-a.

Član 14.
(Pravilnik o radu FERK-a)

Unutrašnja organizacija, nadležnost organizacionih jedinica, sistematizacija radnih mjesta i druga pitanja po osnovu rada i radnog odnosa u FERK-u utvrđuju se Pravilnikom o radu FERK-a.

DIO TREĆI - NAČIN RADA FERK-a

Član 15.
(Imenovanje, sastav i mandat članova FERK-a)

- (1) Imenovanje, sastav, mandat i uslovi za izbor i prestanak mandata članova FERK-a propisani su odredbama Zakona o električnoj energiji u Federaciji Bosne i Hercegovine.
- (2) Članovi FERK-a obavljaju svoju dužnost profesionalno, te prava i dužnosti iz radnog odnosa ostvaruju u FERK-u.

Član 16.
(Funkcija predsjednika FERK-a)

Funkcija predsjednika FERK-a je izmjenjiva i traje godinu dana.

Član 17.
(Nadležnosti predsjednika FERK-a)

- (1) Predsjednik rukovodi radom FERK-a. Nadležnosti predsjednika su:
 - a) potpisuje akte FERK-a,
 - b) predstavlja FERK pred trećim licima,
 - c) saziva sjednice FERK-a i predsjedava istim,
 - d) nadgleda provođenje akata FERK-a,
 - e) obavlja i druge poslove u cilju osiguranja efikasnog rada FERK-a.
- (2) Predsjednik FERK-a može odrediti drugog člana FERK-a da privremeno obavlja neke ili sve dužnosti predsjednika.

Član 18.
(Prava i obaveze članova FERK-a)

- (1) Članovi FERK-a imaju jednaka prava i obaveze učestvovati u radu na donošenju i sprovođenju akata FERK-a.
- (2) Član FERK-a ima pravo predložiti razmatranje pojedinih pitanja na sjednicama FERK-a, o čijem prijedlogu članovi FERK-a donose odluku u roku od 30 dana od dana podnošenja prijedloga.
- (3) Član FERK-a ima pravo i obavezu da bude redovno informisan o svim pitanjima vezanim za rad FERK-a.
- (4) Član FERK-a snosi pojedinačanu odgovornost za svoj rad i kolektivnu odgovornost za rad FERK-a.

Član 19.
(Obavljanje dužnosti u FERK-u)

- (1) Član FERK-a i zaposlenik FERK-a je obavezan svoju funkciju obavljati savjesno i odražavajući integritet FERK-a.
- (2) Članovi FERK-a i zaposlenici FERK-a obavezni su pridržavati se Etičkog kodeksa FERK-a.
- (3) Član FERK-a i zaposlenik FERK-a ne smije koristiti svoj rad u FERK-u, niti njen integritet za ostvarivanje ličnih ili drugih ciljeva koji su u suprotnosti sa zakonom ili Etičkim kodeksom FERK-a.

Član 20.
(Javnost rada)

- (1) Sve odluke FERK-a donose se na redovnim i vanrednim sjednicama FERK-a koje su otvorene za javnost, osim odluka koje se odnose na interna administrativna pitanja, što će se bliže urediti pravilima i propisima FERK-a.
- (2) Tokom redovnih i vanrednih sjednica, FERK može po potrebi, održati zatvorenu sjednicu u cilju zaštite povjerljivih informacija kao i u drugim slučajevima definisanim Poslovnikom o radu FERK-a.
- (3) Članovi FERK-a mogu se sastati interno, bez pristupa javnosti, ali odluke iz nadležnosti FERK-a ne mogu se donositi na internim sastancima. Svrha internih sastanaka je poboljšanje efikasnosti i kvaliteta rada FERK-a.
- (4) FERK će donijeti Poslovnik o radu u cilju regulisanja osnovnih procedura i postupaka FERK-a.

Član 21.
(Sjednice FERK-a)

- (1) Sjednice FERK-a održavaju se najmanje jednom u 30 dana.
- (2) Predsjednik FERK-a saziva i predsjedava sjednicama.
- (3) Predsjednik je obavezan sazvati sjednicu FERK-a na zahtjev bilo kojeg od druga dva člana FERK-a.

Član 22.
(Glasanje i donošenje odluka FERK-a)

- (1) FERK donosi sve odluke većinom glasova, a svaki član FERK-a, uključujući predsjednika, ima jedan glas.
- (2) Za glasanje i donošenje odluka FERK-a obavezno je prisustvo sva tri člana FERK-a.
- (3) Pod opravdanim okolnostima, član FERK-a može prisustvovati redovnoj i vanrednoj sjednici putem telefona ili drugog adekvatnog tehničkog sredstva komuniciranja ukoliko nije u mogućnosti prisustvovati lično i takvo prisustvo će se smatrati prisustvovanje u svrhu raspravljanja i glasanja.
- (4) Predsjednik ili njegov privremeni zamjenik mora biti prisutan na svakoj redovnoj i vanrednoj sjednici.

Član 23.
(Akti FERK-a)

- (1) FERK donosi opšte i pojedinačne akte.
- (2) Opšti akti FERK-a su Poslovnik o radu, Etički kodeks i drugi opšti akti neophodni za njegov rad, doneseni u skladu sa Zakonom o električnoj energiji u Federaciji Bosne i Hercegovine, ovim Statutom i drugim zakonskim i podzakonskim aktima.
- (3) Putem pojedinačnih akata FERK će odlučivati o pitanjima iz svoje nadležnosti, kao i o internim administrativnim pitanjima kao što su ostvarivanje prava iz radnog odnosa, poslovanje FERK-a kao pravnog lica i slično.
- (4) Pojedinačni akti koje je donio FERK iz svoje nadležnosti su konačni.
- (5) Protiv pojedinačnih akata FERK-a, strana u postupku može pokrenuti upravni spor kod nadležnog suda.

Član 24.
(Objava akata FERK-a)

- (1) Statut, Poslovnik o radu, pravila i propisi FERK-a, koji su doneseni u okviru regulatorne nadležnosti, objavljuju se u „Službenim novinama Federacije BiH“.
- (2) Drugi akti FERK-a doneseni u okviru regulatorne nadležnosti, koji se objavljuju u „Službenim novinama Federacije BiH“ su:
 - a) odluke i rješenja u tarifnom postupku,
 - b) rješenja vezana za dozvole,
 - c) odluke o regulatornoj naknadi,
 - d) tumačenje i stavovi FERK-a,
 - e) drugi akti FERK-a za koje FERK odluči da ih objavi u „Službenim novinama Federacije BiH“, a koji su od značaja za neodređeni broj učesnika.
- (3) Obavezi objavljivanja u „Službenim novinama Federacije BiH“ ne podliježu sljedeći akti FERK-a:
 - a) pojedinačni akti doneseni po žalbama u drugom stepenu,
 - b) presude arbitraže,
 - c) rješenja o preduzimanju mjera nakon obavljenih redovnih i vanrednih nadzornih provjera kod imaoca dozvola,
 - d) zaključci kojima se odlučuje o proceduralnim pitanjima u postupku ili kojima se rješavaju jednostavnije stvari u postupku.
- (4) Akti iz stava (3) ovog člana objavljuju se na web stranici i oglasnoj tabli FERK-a.

DIO ČETVRTI - FINANSIRANJE RADA FERK-a

Član 25. (Finansiranje rada FERK-a)

- (1) FERK se finansira iz prihoda od regulatornih naknada i jednokratnih naknada koje će naplaćivati od imaoaca dozvola koji se bave djelatnošću iz člana 12. Zakona o električnoj energiji u Federaciji Bosne i Hercegovine i iz prihoda koje ostvaruje na osnovu drugih zakona iz oblasti energije, kao i od prihoda od naknada za dozvole koje izdaje, uključujući i naknade troškova na osnovu arbitraže.
- (2) Naknade iz stava (1) ovog člana bit će određene tako da pokrivaju troškove FERK-a.
- (3) Višak prihoda od regulatornih i jednokratnih naknada iz stava (1) ovog člana kao i drugih naknada ostvarenih od poslova iz nadležnosti FERK-a, u odnosu na finansijski plan FERK-a, prenosi se u prihod za narednu godinu.

Član 26. (Budžet FERK-a)

Budžet FERK-a usvaja Parlament Federacije BiH prije početka budžetske godine, na prijedlog FERK-a.

DIO PETI - TRANSPARENTNOST RADA FERK-a

Član 27. (Informisanje javnosti)

- (1) FERK objavljuje svoj budžet i godišnji izvještaj o radu.
- (2) FERK osigurava dostupnost svojih akata javnosti.
- (3) FERK može zatražiti mišljenje javnosti tokom postupaka pred FERK-om ili o bilo kojem drugom pitanju iz nadležnosti FERK-a.

Član 28. (Drugi oblici informisanja)

Radi potpunijeg informisanja o svom radu, FERK objavljuje posebne publikacije, časopise, medije, biltene, saziva konferencije za štampu i uređuje web stranicu.

DIO ŠESTI - ZAŠTITA POVJERLJIVIH INFORMACIJA

Član 29. (Pojam povjerljive informacije)

- (1) Pod povjerljivom informacijom smatra se informacija koja je zakonom, drugim propisom, opštim aktom ili drugim aktom FERK-a ili drugog nadležnog organa ili pravnog lica donesenim na osnovu zakona, određena povjerljivom i koja ukoliko se otkrije, može ugroziti interes ili integritet FERK-a, drugih pravnih ili fizičkih lica.

- (2) Dostavljanje povjerljivih informacija Parlamentu Federacije BiH ili drugoj nadležnoj instituciji, preko izvještaja odobrenih od FERK-a, neće se smatrati otkrivanjem povjerljivih informacija, a FERK će preduzeti odgovarajuće korake da dostavljene informacije i dalje bivaju tretirane kao povjerljive od strana kojima se dostavljaju.

Član 30.
(Obaveza zaštite povjerljive informacije)

Članovi FERK-a i zaposlenici FERK-a obavezni su čuvati povjerljive informacije koje su im dostupne prilikom obavljanja dužnosti ili zadataka u FERK-u u skladu sa pravilima i propisima FERK-a.

Član 31.
(Procedure čuvanja povjerljivih informacija)

FERK Pravilnikom o zaštiti povjerljivih informacija definiše procedure za zaštitu povjerljivih informacija.

DIO SEDMI - POSTUPAK IZMJENE I DOPUNE STATUTA

Član 32.
(Predlaganje izmjena i dopuna Statuta)

Izmjene i dopune Statuta može predložiti bilo koji član FERK-a, o čemu članovi FERK-a donose odluku u roku od 30 dana od dana podnošenja prijedloga.

Član 33.
(Donošenje izmjena i dopuna Statuta)

Izmjene i dopune ovog Statuta donose se na način i po postupku propisanom za njegovo donošenje.

DIO OSMI – SAGLASNOST I TUMAČENJE STATUTA

Član 34.
(Saglasnost na Statut)

Na ovaj Statut saglasnost daje Parlament Federacije BiH.

Član 35.
(Tumačenje)

Tumačenje pojedinih odredbi ovog Statuta daje FERK.

DIO DEVETI - PRELAZNE I ZAVRŠNE ODREDBE

Član 36. (Originalni primjerak Statuta)

- (1) Originalni primjerak Statuta je primjerak koji su usvojili članovi FERK-a, potpisao predsjednik FERK-a i na koji je saglasnost dao Parlament Federacije BiH i koji je verifikovan pečatom FERK-a.
- (2) Originalni primjerak Statuta kao i izmjene i dopune Statuta spojeni su i čuvaju se ukoričeni u posebnoj knjizi.

Član 37. (Stupanje na snagu)

Ovaj Statut stupa na snagu sljedećeg dana od dana objavljivanja u „Službenim novinama Federacije BiH“.

Broj: 01-01-1284-02/13
Mostar, 30.10.2013. godine

